

Anwar: RUU Perhimpunan Aman sangat lemah, Najib patut batal saja
The Malaysian Insider
27 November , 2011
Oleh Shannon Teoh

JOHOR BARU, 27 Nov — Datuk Seri Anwar Ibrahim menggesa Barisan Nasional (BN) tidak meneruskan Rang Undang-undang Perhimpunan Aman 2011 yang digubal dengan begitu lemah sehingga memburukkan lagi kebebasan rakyat negara ini.

Ketua Pembangkang itu mendakwa pentadbiran Najib kini mahu rang undang-undang itu dibahaskan dengan hanya melakukan pindaan ke atas tujuh peruntukan, dalam beberapa hari selepas dibentangkan di Parlimen.

Ketika ditemui The Malaysian Insider di sini, Anwar (gambar) berkata, rang undang-undang itu sewajarnya ditarik balik manakala Seksyen 27 Akta Polis, yang memerlukan permit polis untuk mengadakan perhimpunan awam, dimansuh tanpa membawa sebarang akta baru.

“(Perkembangan) ini membuktikan ia (Rang Undang-undang Perhimpunan Aman 2011) bukan satu perundangan yang digubal dengan baik. Sekarang mereka cuba meneruskan perbahasan dengan membawa pindaan.

“Anda tidak boleh berbuat demikian dan memutuskan pindaan dalam waktu yang singkat begitu sahaja,” kata Ketua Umum PKR ini merujuk kepada kenyataan Menteri di Jabatan Perdana Menteri Datuk Seri Nazri Aziz semalam bahawa Kabinet telah bersetuju untuk membawa beberapa pindaan di peringkat jawatankuasa ketika dibahaskan di Dewan Rakyat.

Beliau yang juga Ahli Parlimen Permatang Pauh menambah, “tidak ada keperluan untuk mengawal selia demonstrasi” di negara ini.

“Sudah ada undang-undang untuk menjamin keselamatan awam, jadi mansuhkan saja Seksyen 27,” katanya lagi.

Dalam kenyataannya semalam, Nazri berkata Kabinet telah memberi lampu hijau untuk meminda tujuh peruntukan dalam Rang Undang-undang Perhimpunan Aman 2011.

Keputusan itu diambil dalam mesyuarat Kabinet kelmarin, kata Nazri sambil menambah, “di mana kita telah memaklumkan kepada Pejabat Peguam negara iaitu rang undang-undang ini apabila dibahas hendaklah diberikan juga kesempatan membuat pindaan . . . pemindaan setelah bacaan kali pertama dibuat dan dilihat dan dikaji oleh ahli-ahli Parlimen dan kalau sekiranya perlu ada pindaan yang dibuat maka ini hendaklah diberikan . . . pejabat Peguam Negara akur dengan kehendak jemaah menteri.”

Rang undang-undang itu yang digubal ekoran keputusan pentadbiran Najib memansuhkan Seksyen 27 Akta Polis mendapat kritikan banyak pihak termasuk pembangkang dan pertubuhan bukan kerajaan.

Katanya, salah satu pindaan yang dipersetujui ialah penganjur perhimpunan awam perlu memberi notis 10 kepada polis berbanding 30 hari yang diperuntukkan dalam rang

undang-undang terbaru ini.

Selain itu di bawah pindaan yang disyorkan pihak penganjur akan dimaklumkan keputusan oleh polis dalam masa 24 jam berbanding 48 jam diperuntukkan dalam Seksyen 12(1).

Kritikan mendakwa rang undang-undang itu mengekang teruk kebebasan rakyat dan lebih teruk berbanding dengan persekitaran semasa.

Perubahan pendirian pentadbiran Najib itu, secara tiba-tiba dipercayai akibat tekanan pelbagai, diambil empat hari selepas ia dibentangkan untuk bacaan kali pertama di Dewan Rakyat.

Tekanan dan kecaman berhubung rang undang-undang itu meningkat dan pengamal-pengamal perundangan dijangka mengadakan protes berkenaan minggu ini.

Selasa ini, Majlis Peguam bercadang untuk mengadakan kempen Walk for Freedom 2011 membantah rang undang-undang itu dan menyerahkan memorandum syor pindaan kepada Timbalan Menteri di Jabatan Perdana Menteri Datuk Liew Vui Keong.

Pihaknya mahu syor pindaan itu dibincangkan di jawatankuasa pilihan khas Parlimen, idea yang turut dibangkitkan oleh Persatuan Hak Asasi Manusia (Proham).

Kelmarin, Suhakam mengemukakan 11 syor kepada pentadbiran Najib agar meminda peruntukan Rang Undang-undang Perhimpunan Aman termasuk mengkaji semula tempoh notis wajib 30 hari atas alasan ia tidak praktikal dengan tujuan perundangan baru itu.

Malah Pengerusi Bersih 2.0 Datuk Ambiga Sreenevasan menegaskan kebebasan rakyat di Malaysia kini lebih terhad ekoran undang-undang baru perhimpunan aman berbanding di Myanmar, negara Asean yang pernah mempamerkan rekod hak asasi manusia paling buruk.

Ambiga berkata, Myanmar telah meluluskan undang-undang baru baru-baru ini yang membenarkan protes jalanan dan syarat-syarat yang jauh lebih kecil berbanding Rang Undang-undang Perhimpunan Aman dibawa Perdana Menteri Datuk Seri Najib Razak di bawah transformasi politik beliau.

The Malaysian Insider

Hakcipta © 2011 The Malaysian Insider

Source: <http://www.themalaysianinsider.com/bahasa/article/anwar-ruu-perhimpunan-aman-sangat-lemah-najib-patut-batal-saja/>